

[Augsburg], 30. September 1560

An Johannes Oporinus

UB Basel, Fr. Gr. I 11, fol. 237r.  
Steinmann Nr. 728.

S. Iter ingressurus, iter ingressuro Postello hanc schedam dedi. De Epicteto nostro facies quod videbitur. Tu cum hic esses, animos mihi addidisti, vt pergerem. Nec paenitet. Vt enim alijs non prosim: mihi profui. Sed spero me profuisse multis aut profuturum potius. Quòd ni ita esse putarem: nunquam tantos labores caepissem. Credas enim mihi velim affirmanti, nullum ferè esse Arriani caput, quod non plus mihi temporis abstulerit, ob et deprauatum codicem, et argutias Stoicae orationis, quam breuiuscula Demosthenis aut Isocratis oratio. Neque enim acquiesco mendis librariorum, sed veram sententiam, quoad possum et scio, eruere studeo. οὐ ναὶ μὰ Δία διὰ κενοδοξίαν ἢ φιλονεικίαν. Sed quia me diuinitus ad hoc opus impulsum esse existimo. Conuersio Arriani iampridem absoluta fuit, sed emendatio plus postulat temporis. In Simplicio conuertendae mihi restant pagellae 70. Nisi me fatalis aliquis casus impedierit aut sustulerit: non morabor praelum tuum, quò minus ad Cal[endas] Martias tres Epicteti tomi edantur. Sin mihi aliquid humanitus acciderit (quod quidem astra minantur) primum saltem tomum vt edas rogo. Reliqua a me inchoata pereant potius, quam cum ignominia mei cadaueris edantur. Nam in conuertendo temere quicquid in buccam venit, scribo, ea etiam quae planè non intelligo. pòst adhibeo limam. Eò me redegit suis disputationibus Epictetus, vt quid de me et meis rebus fiat, minus quam hactenus curem. Sed idem tamen τὸ τε ἀναγκαῖα καὶ τὰ χρειώδη non planè possum negligere. Itaque tum aequiore animo moriar, cum Epictetum meo arbitratu absoluero, etiamsi is mihi posthumus fuerit. Nam de annotationibus et conuersionib[us] graecorum oratorum desperau. δειλὴ δ' ἐπὶ πυθμένι φειδὼ et multa me impediunt. Vale Mi D. Oporine, neque mea causa quicquam cum tuo incommodo feceris. Specto officium, non famam. Neque verò fungar officio, si tibi optime de <me> merito incommodaro. Iterum vale. Pridie Cal[endas] Octobris 1560.

Hiero[nymus] Wolfius  
Tuus.